

民國佛教期刊女獻集成


任繼愈題



民國佛教期刊女獻集成

任繼愈題

第 43 卷



威 音

中國書店

中華郵政特准掛號認爲新聞紙類

威名

第六十八期

威音第六十八期目錄

論說

讀『學佛須知報恩』一文後敬告大眾

釋經

楞伽經述要

專著

教海觀瀾錄（續）

譯述

曼荼羅之研究（續）

演壇

號稱唯識半學的四分三類

新聞

國內之部
國外之部

論說

讀『學佛須知報恩』一文後敬告大眾

客有手佛教日報一束以示予者 指其中一文曰『子盍讀之 僕將質所疑焉』予讀其文 則本年七月中所載東初法師之作 題曰『學佛須知報恩』文分七章長約二萬言 鉅製也 因謂客曰『斯文也 予固早見之 初讀其題 卽覺震我心目 披覽一過 爲之瞿然驚 爲之肅然敬 又爲之躍然喜 驚者何 以報恩一義 在佛教中 素不爲人所知 予久思加以闡揚 因循未果 不圖東初法師之先得我心 竟早作此師子吼也 敬者何 以報恩一義 實出於菩薩仁厚深妙之用心 迴出凡情 彌足尊重 自非智慧雙運福慧齊修之大士 殊未足以語此也 喜者何 以報恩一義 亦居然有人爲之闡揚 由是廣流於五濁之世間 足使人心淳厚

論說

讀『學佛須知報恩』一文後敬告大眾

一

聖道昌明 劫運潛移 覺岸同登也 惟東初法師之文 雖屬先得我心之煌煌鉅製 然於予意中所欲加以闡揚者 固不免機杼微殊 隨喜之餘 原思別杼管見以爲之繼 祇以此係鮮經人道之問題 材料尙待搜集 端緒尙待整理 一時殊未能窮源究委 作一推闡盡致之介紹 雖然 君若有疑 仍將答焉』

客曰『東初法師文中 以四恩分析報恩之對象 四恩一名 雖爲人所習聞 然佛家所謂四恩 亦有多說 就僕所見 乃得四種

第一種四恩說

- (1) 父母恩
- (2) 衆生恩
- (3) 國王恩
- (4) 三寶恩

此種四恩 見心地觀經卷二報恩品

第二種四恩說

(1) 母恩

(2) 父恩

(3) 如來大師恩

(4) 說法法師恩

此種四恩 見正法念處經卷六十一 大藏法數卷二十三等

第三種四恩說

(1) 父母恩

(2) 師長恩 (一作師友恩)

(3) 國王恩

(4) 施主恩 (一作檀越恩)

此種四恩 見釋氏要覽卷中恩孝篇

第四種四恩說

(1) 天下恩

(2) 國王恩

(3) 師尊恩

(4) 父母恩

此種四恩 亦見大藏法數卷二十三

綜上所述 佛家所謂四恩 其說亦殊不一 故日本眞宗學者月感大師所作『四恩論』中 嘗分七科 卽父母 國王 衆生 非情 施者 師長 三寶 是也 蓋彼乃合諸說而言之者 特名實爲四 而科乃分七 亦有未安 然則吾人今說四恩 究應何去何從乎 抑恩處並不止四乎 彼東初法師文中 乃僅取第一種四恩說 又易國王恩爲國家恩 於義安乎』

予曰『如君所述四恩之說 雖有四種 實則仍應通而爲一 其中最普遍最完

備而足以代表全部者 卽第一種是 蓋身之所出 由於父母 故首稱父母之恩
環身而存 乃有衆生 故次稱衆生之恩 衆生之治安 又賴夫國王 故次稱國王
之恩 終得出世聖道 只爲皈依三寶 故末稱三寶之恩 卽此已足包括其餘三說
並無遺漏也

若第二種 則僅就四恩中析出其較重者 謂父母恩與三寶恩固重於衆生與國
王之恩也 由父母恩與三寶恩各分爲二 遂成第二種四恩說 故此又稱『四種重
恩』 彼觀無量壽經有「孝養父母奉事師長」之教 梵網經有「孝順父母師僧三
寶」之誡 其他諸經論中 亦多於父母三寶之恩特加表章 而存覺之報恩記 卽
專就父母師長之恩而說報恩者 蓋父母爲生身所自出 三寶（師長卽在其中）爲
法身所自出 父母與我生命 三寶與我慧命 一教一養 一聖一凡 其恩之深重
均迥非其他可比 故別稱重恩而另分爲四 然固亦第一種四恩說中所含有者也
若第三種 則專就出家衆而言四恩 故又稱『出家四恩』 彼謂出家之人 稟

父母遺體而得成人 其生成養育之恩 如天罔極 復令出家 進修道業 故出家須報父母恩 又謂出家之人 蒙師剃度教誨 授以經業 及得善友 講明妙道 開發慧性 故出家須報師友恩 又謂出家之人 國王聽許 方得出家 又蒙治化之力 無強弱陵逼之憂 而得安居山林 進修道業 兼復飲食水土 皆屬國王 故出家須報國王恩 又謂出家之人 凡所資身飲食衣服等物 皆由施者供給 遂得安身辦道 故出家須報檀越恩 此之四恩 雖若與第一種四恩說有異 然其師友恩即與第一種之三寶恩相當 其檀越恩即與第一種之衆生恩相當 出家之人三寶莫非師友 衆生莫非檀越也

若第四種 則就第三種而易施主恩爲天下恩 自非專就出家衆而言四恩者 其所謂天下恩 要亦與第一種之衆生恩無異 則仍不出第一種四恩說耳 或曰 天下恩殆亦包括非情而言 較衆生恩之僅及有情者爲廣 如大智度論謂佛多住舍婆提城 爲報生地恩故 又多住王舍城 爲報法身地恩故 菩薩固視天下一切悉

爲恩處也 惟大藏法數說此種四恩時 並無解釋 未能明其真意之界域 而四恩之說 似應仍以有情爲限 否則逕稱一切恩處可矣 故今仍由第一種四恩說統焉 至於東初法師易國王恩爲國家恩 則爲因時制宜之說 並不足病 國王原卽國家之領袖 名異而實無所異也

特言及菩薩之報恩 實應以一切恩處爲對象 方契乎菩薩廣大第一之心 今東初法師僅及乎四恩 微嫌未能盡其量耳』

客又曰『菩薩視一切爲恩處 而圖所以爲報 此其宅心仁厚 待物慈祥 固極足讚歎者 惟菩薩於一切法 當以平等一如之心觀之 旣無愛憎 亦無恩怨 今乃認爲有恩 不於菩薩廣大第一之心量反有礙乎』

予曰『善哉問也 斯疑不釋 學人惑者多矣 今試以六度譬之 夫菩薩之修六度 原應三輪悉空 不見其能修所修等法 然菩薩固不能不修六度也 此其故何耶 蓋菩薩猶在因位之中 卽其乘願再來者 亦須示與衆生同事 就此種凡夫

境界而論 種種差別現前 並不能立躋於平等一如之域 故必有待夫修 菩薩所修六度 亦不過差別境界中所有耳 若其得度 此六即無 在未度時 此六却不可少 於此當知菩薩不見有布施而仍力行布施 不見有淨戒而仍力持淨戒 不見有安忍而仍力修安忍 不見有精進而仍力求精進 不見有靜慮而仍力習靜慮 不見有般若而仍力學般若 且六度功德 畢竟真實不虛 斯正爲身在差別中之一種說法也 今之認一切爲有恩 卽亦如是 吾人惟自問身在何種境界中耳 若就差別未泯之境界而行菩薩道 則其視一切爲恩處 固所當然 由此正可漸躋於平等一如 與菩薩廣大第一之心量又何嘗有礙乎

況夫恩處固不可不知 亦不可不報者 在世間法中 其受恩而不知不報之人 固共鄙爲非人 而在出世間法中 亦復極關重要 如心地觀經云 一世間凡夫 無慧眼 迷於恩處失妙果 五濁惡世諸衆生 不悟深恩恆背德 我故開示於四恩 令人正見菩提道 大方廣佛不思議境界經云 一知恩者 雖在生死 不壞善

根 不知恩者 善根斷滅 作諸惡業 故諸如來讚知恩者」 於此當知行菩薩道者 正應知一切恩處之有恩而求所以爲報 否則非菩薩矣 世有背捨父母以求出家 輕忤師長而言修行者 是豈得爲諸佛之所許乎」

客又曰『報恩一義 在菩薩道中之運用 可得聞乎 彼東初法師文中 僅云學佛須知報恩 報恩還須學佛 而於運用報恩一義 固有所未詳也』

予曰『菩薩道中 運用報恩一義 亦可謂徹始徹終 無時或離 經論廣說非可具陳 今且就其大者略舉一二

(甲)菩薩內對己身之用心

菩薩之一切修行 應恆以報諸恩處爲念 此固菩薩仁厚深妙之用心所應爾 於此亦可以破除我慢 遠離執著 策起精進 成熟善根 聚集福德 增益智慧 今且引攝大乘論中所說菩薩修六度時之六種作意修 以見菩薩內對己身之用心

『作意修者 謂修六種意樂所攝愛重隨喜欣樂作意 一廣大意樂

二長時意樂 三歡喜意樂 四荷恩意樂 五大志意樂 六純善意樂

若諸菩薩乃至若干無數大劫 現證無上正等菩提 經爾所時 一

一剎那 假使頓捨一切身命 以殄伽河沙等世界 盛滿七寶 奉施

如來 乃至安坐妙菩提座 如是菩薩布施意樂猶無厭足 經爾所時

一一剎那 假使三千大千世界滿中熾火 於四威儀 常乏一切資

生眾具 戒忍精進靜慮般若心恆現行 乃至安坐妙菩提座 如是菩

薩所有戒忍精進靜慮般若意樂猶無厭足 是名菩薩廣大意樂 又諸

菩薩即於此中無厭意樂 乃至安坐妙菩提座 常無間息 是名菩薩

長時意樂 又諸菩薩以其六種波羅密多饒益有情 由此所作 深生

歡喜 蒙益有情所不能及 是名菩薩歡喜意樂 又諸菩薩以其六種

波羅密多饒益有情 見彼於己有大恩德 不見自身於彼有恩 是名

菩薩荷恩意樂 又諸菩薩卽以如是六到彼岸所集善根 深心迴施一切有情 令得可愛勝果異熟 是名菩薩大志意樂 又諸菩薩復以如是六到彼岸所集善根 共諸有情迴求無上正等菩提 是名菩薩純善意樂』

觀此 可知菩薩內對己身之用心 報恩一義 固恆運用者也
(乙)菩薩外對衆生之用心

菩薩之普度衆生 亦應恆以報諸恩處爲勸 此固亦菩薩仁厚深妙之用心所應爾 於此亦可以破除彼等我慢 遠離彼等執著 策起彼等精進 成熟彼等善根 聚集彼等福德 增益彼等智慧 今且引瑜伽師地論中所說菩薩初持瑜伽處菩提分品之六種方便善巧 以見菩薩外對衆生之用心
『復有六種方便善巧 一者 隨順會通方便善巧 二者 共立要契方便善巧 三者 異分意樂方便善巧 四者 逼迫所生方便善巧』

五者 施恩報恩方便善巧 六者 究竟清淨方便善巧 云何菩薩隨順會通方便善巧 謂諸菩薩 於彼有情 將爲說法 先當方便隨順現行輒美身語 亦復現行近施隨轉 除彼於己所生悲惱 彼悲惱除便生愛敬 愛敬生已 於法起樂 然後爲其宣說正法 所說正法如其所宜 易入易解……是名菩薩隨順會通方便善巧 云何菩薩共立要契方便善巧 謂諸菩薩 若見有情求飲食等十資身具 卽便共彼立要契言 汝等若能知父母恩 恭敬供養 及諸沙門婆羅門等廣說如前 乃至若能受持淨戒 如是我當隨汝所欲施飲食等諸資身具 如其不能 我不施汝……是名菩薩共立要契方便善巧 云何菩薩異分意樂方便善巧 謂諸菩薩 與諸有情立要契已 彼諸有情於上所說彼彼事中 不如所欲速疾修行 菩薩爾時於如上說彼所求事皆不施與……若諸有情 於菩薩所 雖無所求……菩薩於彼隨

宜勸導 斷諸惡法 修諸善法 所謂令彼知父母恩 恭敬供養 廣說乃至於淨尸羅隨順受學 若彼有情 雖蒙菩薩如是勸導 故肆輕躁而不奉行 菩薩爾時自現憤責……或於一類現與世間不饒益事 唯爲利益……名爲菩薩異分意樂方便善巧 云何菩薩逼迫所生方便善巧 謂諸菩薩 或爲家主 或作國王 得增上力 於自親屬 於自臣民 能正教誡 如應告言 諸我親屬 諸我臣民 若於父母不知恩報 廣說乃至毀犯戒者 我當斷其常所給賜衣服飲食 或當捶罰 或我親屬 當與乖離 或我臣民 當永驅擯 立一善巧機捷士夫 於彼事業常令伺察……名爲逼迫所生方便善巧 云何菩薩施恩報恩方便善巧 謂諸菩薩 先於有情隨力少多施作恩惠 或施所須 或濟厄難 或除恐怖 或會所愛 或離非愛 或療病苦 令得安樂 彼諸有情深知恩惠欲報德者 菩薩爾時勸令修善 以受報恩